

Russia 'khianati' perjanjian bijirin

Serangan terhadap pelabuhan di Odessa jejas kesepakatan atasi krisis makanan global

Kyiv: Peluru berpandu Russia yang membedil pelabuhan Ukraine di Odessa semalam disifatkan Kyiv sebagai 'satu pengkhianatan' terhadap perjanjian membatalkan kedua-dua negara itu.

Sehari sebelum itu, kedua-dua negara telah memeterai perjanjian untuk menyambung semula eksport bijirin yang disekat disebabkan konflik berkenaan.

Tentera Ukraine berkata, pertahanan udaranya telah menembak jatuh dua peluru berpandu, namun dua lagi telah mengenai pelabuhan.

Ini secara langsung mengancam perjanjian penting yang diputuskan selepas berbulan-bulan, bertujuan menangani krisis makanan global.

Jurucakap Kementerian luar Ukraine berkata, serangan itu adalah 'pengkhianatan' oleh pemimpin Russia, Vladimir Putin terhadap perjanjian yang diputuskan bersama Presiden Turki, Recep Tayyip Erdogan dan ketua Pertubuhan Bangsa-Bangsa Ber-

satu (PBB), Antonio Guterres.

Presiden Ukraine, Volodymyr Zelensky mendakwa serangan ke atas Odessa menunjukkan Moscow tidak dapat menunaikan janjinya.

"Ini membuktikan hanya satu perkara; tidak kira apa yang Russia katakan dan janjikan, ia akan mencari jalan untuk tidak melaksanakannya," katanya semasa pertemuan dengan penggubal undang-undang Amerika Syarikat (AS), menurut satu kenyataan dikeluarkan pejabat presiden.

PBB kutuk serangan

Odessa adalah salah satu daripada tiga hab eksport yang ditetapkan dalam perjanjian itu dan pegawai Ukraine berkata, bijirin disimpan di pelabuhan itu ketika serangan itu dilancarkan.

Bagaimanapun, stok makanan di situ langsung tidak terjejas. Guterres yang mempengerusikan majlis menandatangani perjanjian itu Jumaat lalu secara tegas mengutuk serangan berkenaan,

kata timbalan jurucakapnya.

Beliau turut menggesa semua pihak untuk berpegang pada perjanjian itu.

"Produk ini amat diperlukan untuk menangani krisis makanan global dan meringankan penderitaan berjuta-juta orang yang memerlukan di seluruh dunia," katanya.

Ketua dasar luar Kesatuan Eropah (EU), Josep Borrell menyalahkan Russia atas serangan itu.

"Menyerang sasaran penting untuk eksport bijirin sehari selepas perjanjian itu ditandatangani di Istanbul amat tercela dan sekali lagi menunjukkan sikap Russia yang tidak menghiraukan undang-undang dan komitmen antarabangsa," katanya.

AS turut 'mengutuk sekeras-kerasnya' serangan itu.

Setiausaha Negaranya, Antony Blinken, berkata ia 'menimbulkan keraguan serius terhadap kredibiliti komitmen Russia terhadap perjanjian yang dimeterai semalam'.

AFP

“Ini membuktikan hanya satu perkara; tidak kira apa yang Russia katakan dan janjikan, ia akan mencari jalan untuk tidak melaksanakannya”

Volodymyr Zelensky,
Presiden Ukraine

